



SIARAN MEDIA

KPK SASAR PENGUMPULAN 90 RIBU KILOGRAM MINYAK SAWIT TERPAKAI SEHINGGA AKHIR DISEMBER 2023

Kementerian Perladangan dan Komoditi (KPK) dengan kerjasama PETRONAS Dagangan Berhad (PDB) telah mengadakan Program Pengumpulan Minyak Masak Terpakai di Dewan Masyarakat Kampung Tunku, Petra Jaya, Kuching, Sarawak sempena Trek Komoditi Zon Sarawak anjuran KPK pada 25 November 2023.

Program Pengumpulan Minyak Masak Terpakai ini merupakan acara pertama bagi siri Trek Komoditi Zon Sarawak yang berlangsung selama dua hari bermula 25 November sehingga 26 November 2023 meliputi daerah Kuching, Kota Samarahan, Simunjan dan Serian.

Tujuan Program Pengumpulan Minyak Masak Terpakai ini adalah untuk memberikan kesedaran kepada komuniti mengenai kepentingan amalan mengitar semula minyak masak terpakai demi menjaga alam sekitar serta membuka peluang untuk menjana pendapatan tambahan kepada isi rumah.

Beberapa stesen minyak PETRONAS telah terpilih sebagai Pusat Pengumpulan Minyak Masak Terpakai untuk memudahkan orang ramai menghantar dan menjual minyak masak terpakai. Bermula daripada hanya tiga (3) stesen minyak PETRONAS di kawasan Lembah Klang sebagai pusat pengumpulan minyak masak terpakai, kini pusat pengumpulan tersebut telah diperluaskan ke 33 stesen minyak PETRONAS di seluruh Malaysia.

Setakat ini di Sarawak terdapat dua (2) lokasi stesen minyak PETRONAS yang terlibat iaitu Stesen PETRONAS Astana, Kuching dan stesen PETRONAS Desa Senadin, Miri. Program ini akan terus diperluaskan ke stesen-stesen PETRONAS yang terpilih di seluruh negara secara berperingkat. Dengan perluasan ini, KPK menyasarkan jumlah pengumpulan sebanyak 90 ribu kilogram dan penyertaan seramai 6,960 orang awam sehingga akhir bulan Disember 2023.

Sebagai salah satu inisiatif ekonomi kitaran agrikomoditi, PETRONAS akan menggunakan minyak masak terpakai ini sebagai salah satu sumber bahan mentah utama bagi menghasilkan bahan api penerbangan lestari atau *sustainable aviation fuel* (SAF). Melalui kerjasama antara KPK dan PETRONAS, inisiatif pengumpulan minyak terpakai berpotensi untuk memacu permintaan dan harga minyak sawit seterusnya meningkatkan pendapatan pekebun kecil sawit di samping dapat menjana pendapatan tambahan isi rumah.

Bagi memenuhi keperluan pematuhan mandat *Carbon Offsetting and Reduction Scheme for International Aviation (CORSIA)* pada 2027 dan mendukung agenda negara ke arah karbon sifar bersih menjelang tahun 2050, Kementerian menerusi kerjasama dengan PETRONAS sedang meningkatkan daya saing melalui keupayaan penghasilan dan kebolehpasaran bahan api penerbangan lestari (*sustainable aviation fuel, SAF*) berasaskan minyak masak terpakai. Usaha ini adalah bagi mengukuhkan posisi PETRONAS sebagai peneraju pasaran domestik dan rantau Asia Tenggara.

KEMENTERIAN PERLADANGAN DAN KOMODITI
25 NOVEMBER 2023

UNIT KOMUNIKASI KORPORAT | KEMENTERIAN PERLADANGAN DAN KOMODITI



www.kpk.gov.my



Kementerian Perlindungan dan Komoditi



mykomoditi

No. 15, Aras 8, Persiaran Perdana, Presint 2, 62654 Putrajaya, Malaysia.
Tel: 03-88803322 e-mel: ukk@kpk.gov.my